

平  
播  
全  
書

平播全書卷二

明長垣李化龍著

奏議

二運大木勸懲疏

題爲採辦二運告竣分別勸懲并乞恩暫賜停緩以蘇民困以濟兵興事查四川採辦奉部文先採十分之六限以六年分作三運至萬曆三十年報完該頭運木於二十五年十月起解後官民卽竭力分採二運已於二十七年九月內起解訖除起解期日另疏題報外據布政司并督木道冊報各道屬府州縣衛兩運完過木枋根塊中間多

寡有無什伯倍蓰內有前後一人通管者通融均計功罪  
自不相掩有前官蒙賞罰而去後官接管者按數交收勤  
惰更復昭然總之以六分爲率每運二分爲額多者居最  
不及者殿之兼查官帑有無虛冒閭閻有無騷擾互相參  
酌分別勸懲臣謹會同巡按四川監察御史趙標具疏上  
請除分數不甚懸殊別無弊端應獎戒者臣等徑行獎戒  
外其前運無過官今完五分以上及接管官完五分以上  
如成都縣陞任知縣施所學等各官或再運而終始相成  
或初筮而績效已著掄材居最受事能終俱應優敘以備  
紀錄其兩運俱無過共完至六分以上如巴縣知縣文立

經等各官三年採辦多勞兩運拮据並苦雅稱物曲之利足驗人官之能亦應通敘以備紀錄其頭運完一分以下住俸官二運總完四分以上如羅江縣知縣喻言章等各官雖無所加於常數之外亦無所虧於原額之中後效可觀前愆克蓋均應開復原住之俸以示鼓舞內蔡用明喻言章黃日昇後運完至七分以上仍應摘敘備錄其陳敬衷頭運降俸原以擾民有議不止爲分數不足之故仍當待其考滿日定奪者也其通管兩運官共完不及四分蘆山縣知縣王道望威遠縣知縣劉芳聲平武縣陞任知縣李察南溪縣知縣羅應雲江油縣知縣王以甯彭山縣知

縣王大才各官始事已見怠荒小懲不聞警惕廢事如此  
急公謂何兩運有譽重處無說但誤事雖甚擾民未聞當  
貶削其級姑存其官內劉芳聲李寮王道望完共三分以  
上當降一級管事羅應雲王以甯王大才完共一二分上  
下當降二級管事不論其在任陞任隨任議降後當住其  
陞遷待考滿日議奪其原以頭運住俸者徑當罰去從降  
級後開支者也會川衛前後將及四分指揮方泰姑免罰  
建昌衛前後一分以上指揮今陞會鹽守備施勳前所住  
俸徑當罰去姑准開復鹽井甯番越嶲三衛一未俱無指  
揮張維藩李紹武陳文龍除前住俸徑罰外再當罰一

年示懲者也其接管官不及二分合前運尙不及四分度符縣知縣張明卿等各官分之則一無可稱合之則兩不相補工多虛廢政亦平常亦應姑各罰俸一年示戒者也又查得渠縣知縣柳東心多潦草事每張皇僉夫以六兩派以二十兩收九百名之茹苦可念採木二運之工未已三運之夫已派千萬戶之負累堪憐政謝夫西門豹之投民苦於東野畢之御資陽縣知縣詹淑性本剛愎事每因循供應派之義民何忍其財力俱盡盛氣加之僚友豈所謂道義相成小民何以堪之他政無足言矣崇慶州陞任知州周炳恣睢不檢貪黷有聞頭運不及一分二運亦難

兩補山中不給官銀俾義民含悲冷磧水次不查退木致遺材甘朽夷陵尙有訐其賊者多至巨萬有餘卽云讎之口乎或有一於斯矣已經敗露枉自彌縫仁壽縣丁憂知縣麥鎮鼇才資闢茸舉動乖張一百人下鄉拏人是何號令五十夫入山採木各有饋遺賊迹之公私竊取者不下數千木銀之見在追補者尙有三百訑訑自足之政營營苟得之徒以上四官在柳東詹淑當以不及量調簡僻周炳當以不謹例閒住麥鎮鼇當以貪例爲民者也自州縣而上分理者七小總總理者各道府也小總則夔州府同知儲信成都府通判宋家宦重慶府推官高折枝各府則

成都府知府周懋卿順慶府陞任知府饒景暉重慶府知府張興行保甯府署印同知梅燮各道則分守川西道陞任參政范涑陞任參政李維楨分巡川西道副使陳與相分守川東道陞任參議郭士吉俱當在紀錄之列其最無功者則建昌兵糧道副使顧汝學建昌監理通判李復宗甯越撫夷通判張正蒙俱當罰俸三箇月示儆其原任建昌監理通判鄭友諒原降俸二級不准復仍移文見任處所待三年考滿日議復者也自此而上爲各總之總者則督木道布政司也查得離任督木道右布政使周一經爲政有規矩準繩論材是梗枿杞梓握算而錙銖毫芒必照



盡利則窮崖幽谷皆春陛任帶管督木參政李維楨品格擅木天之選藻鑑稱匠石之長掄選則良工獨苦故蔽江皆參天礙日之材博識信大雅不羣卽一節見清廟明堂之器布政司左布政使程正誼博物卓矣工師庇民居然大廈識足以程物土故選擇悉當而鉅細各獻其長明足以辨官材故任使咸宜而公私交相爲利已見萬牛回首行看八柱承天以上三臣除周一經已經加銜致仕外程正誼李維楨當特加薦揚以備錄用者也臣等又據司道冊報總算合省木數頭運完僅二分二運完幾四分緣頭運事屬創始山水崎嶇夷情反覆官民曾未得託足寓目

往往有空費工力而阻險阻夷竟委棄溝壑之中者二運則道路慣熟決擇便利工夫未枉力等工倍該司道照議定規則如法折算總計兩運收報之數以各州縣分計自一分以至十分甚相懸絕而以合省通計截長補短似已足六分之額其規則俱查嘉靖間殿廟大工減三事例以次遞減非敢鑿空創始大都木有頭二三號或以三折一或以二折一二折一者浮於元號圍尺幾四之一三折一者浮於元號圍尺幾三之一雖是以小抵大實則以多抵少卽部收之寬嚴未卜而有刊定之書冊在併齊備查度亦不甚大謬其木號合式者雖少然又部派木數先有定

額隨後減採六分寬限六年又許互相准抵通融折收豈  
非以巨材難得民力難支德意慇懃曷有窮極然尙是二  
十七年以前事彼時蜀猶承平也蜀自今歲之春夏播首  
捐獮中使征權招兵集餉官費百倍民費次之開礦抽稅  
民費百倍官費次之上下交征公私匱竭百姓愁苦無聊  
似不復能勝此役矣矧蜀西北道自來無木合省俱赴採  
於東南夷方今東南賊壘徧地殺氣連天冤魂晝噪愁雲  
慘結蜀之人心震搖動輒以首相驚奔竄隱匿者無虛日  
尙能使之束足裹糧入東南近播處所斫木乎目今求根  
木塊朽難已萬倍於前况折算之令三運已當停罷繼此

如式而求難又萬倍於今此其時困勢窮明白易見且部議原減採六分而今六分近足原寬限三運而今二運報完又值兩宮告成三殿未興而蜀之不辰適與兵會昔尙減額寬緩於無事之日今可不破格寬假於多事之際乎臣等固知皇上明見萬里恩覆二天必不靳此一時之德澤也總乞敕下工部將蜀省採辦暫與停緩待播事稍定之日再議派採以作三殿之需庶一紓徐之間民生得以少甦軍興大有攸賴其各官應紀錄者處分者一一查議覆請移文吏部知會至停採之後亟當照刊定銷算規則清查錢糧儻再有虛冒科索等輩不妨陸續一一舉發其

後採之時須查今日之完欠分數劑量分派不得重累偏  
苦庶有司之勸懲有終而百姓之勞逸勻稱此皆該司道  
之責任部覆更不可不申明也緣係採辦二運告竣分別  
勸懲并乞恩暫賜停緩以蘇民困以濟兵興事理未敢擅  
便爲此具本專差承差高廣勳齋捧謹題請旨奉聖旨工  
部知道本部覆奉聖旨依擬行

懸購規則疏

題爲酌議軍前賞罰事規以一羣情以圖全勝事臣聞亂臣賊子人人得而誅之楊應龍以一土司造反臣躬承主命率天下忠臣義士共行天誅上伐下大加小順討逆勝負之算豈俟問哉顧惟賞功罰罪聖主所以服人賞信罰必聖主所以勵世自古用兵未有賞罰不明而可以成功者近該兵部題奉聖旨頒示賞格錫予優厚等級分明計懸示之後賊當授首臣亦何容再瀆顧部職其要止於議賞臣職其詳當並議罰先是臣有擬定擒斬投降之賞畏留失事之罰與夫一切先登陷陣大小賞格與今所頒詳

略互異有已密行頒發者有候臨事顯行者以軍機不可  
先傳未敢輒行題奏卽今兵漸集餉漸充各省調兵漸有  
音耗卽宜合謀設策漸次圖賊但因年來勦撫無常賞罰  
不定人心疑貳未卽信從所有前項事規必須預行題奉  
聖旨臨時與兵部所頒並行懸示方可鼓舞羣情齊一眾  
志人人用命平定有期謹將擬定規格開具上請伏乞敕  
下兵部議覆行臣遵奉施行緣係酌議軍前賞罰事規以  
一羣情以圖全勝事理未敢擅便爲此具本開坐專差齎  
捧謹題請旨

計開

一不論大小文武漢土官兵軍民人等但有能擒斬楊應龍正身者除照兵部原擬及今增定賞格陞賞外仍加賞銀一萬兩功級驗明當卽給與

一各土司如水西安疆臣永甯奢世續西陽冉御龍石砭馬千乘以至天全平茶邑梅等大小衙門有能督率部兵擒斬楊應龍者除照兵部原格陞賞及瓜分地土外其本官係宣慰者加副總兵銜給蟒衣玉帶宣撫加參將長官及知府知州加遊擊將軍仍各給飛魚服色的親子弟准遞加官職領兵頭目准授長官或指揮千百戶等官世襲一不論漢土官兵軍民人等有能奮勇先登入樓山關崖



門關大灘關苦竹關板角關三渡關黃灘關烏江關者陞  
三級賞銀一千兩有能奮勇先登打破播州城者陞五級  
賞銀三千兩有能奮勇先登打破海龍囤雖本身不能擒  
斬應龍而大眾驗係真正當先者陞七級賞銀五千兩

一應龍手下軍師黃七孫時泰等謀士何漢良李旭戴貴  
張玉彭道張漢清何廷瑞陳太等督軍總管楊兆麟郭通  
緒楊珠楊明等內司總管何邦甯田一鵬田良玉等提調  
巡警尙守忠趙仕登謝朝俸張漢武羅剛朱敬袁守剛陳  
大恩石勝等苗頭總管吳金錢吳金富石朝貴曹萬曹嚴  
等各里頭目婁國張讓穆炤袁年袁登王繼先等及其餘

但係領兵議事之人若有能率眾來歸或攜家歸附者以前罪惡盡除不問原有官者仍以原職守土原無官者授以指揮千百戶職銜令立功自效若能擒斬應龍者除照兵部原格陞賞外仍加賞銀一萬兩願爲土官者聽分其地世守內有楊氏親枝除擒斬照格陞賞外投降者仍量授土職承其宗祀

一應龍妻田氏子朝棟等能將應龍縛獻或致死獻出其屍准免本身死罪使得承奉其祖宗香火仍照部格量與優恤

一管國僞內官葉喜受閭懷石等及一切守國之人與質

當頭目妻子能率眾拒圍以待官兵不容應龍走入者僞官照先登圍例給賞餘人照例陞賞若能擒斬應龍者除陞賞外仍加賞銀一萬兩

一應龍桃溪莊丁五十四里八十八局人戶及節年招九股惡苗及紅腳黑腳等苗有能自己束身投出者並不殺害係播民者仍管原業係苗民者量其遠近給以路費及照身批文發回原籍有能率眾舉義擒斬應龍來獻者與官民一體陞賞

一五司七姓之人有能擒斬應龍者有官者照土官無官者照土兵各破格陞賞仍賞銀一萬兩不拘原題三級之

例

一原格斬獲撥置同謀親信用事緊關從賊者將領遞陞  
二級官丁准照虜功頭目陞賞查例斬獲虜功頭目者應  
陞三級賞銀一百五十兩擒斬脇從者准照苗功計數倍  
賞查例苗級一顆賞銀五兩今加倍應賞銀十兩

一應龍頭目人等各係本省及外省人氏各有籍貫俱已  
查明若賞格懸示兩月之後既不能擒斬又不肯投降直  
至拒敵交兵爲賊盡力其家卽係謀反之家賊平之後卽  
移文原籍將父兄子姪人等盡以謀反家屬捕誅  
一各土司有陽順陰逆逗遛觀望不肯盡力卽係附反之

人賊平之日移師伐之

一各將領如定有信地不行赴守定有師期不行赴敵及一切逗遛觀望畏縮退怯等情查照所犯輕重應收監者收監應斬首者斬首若軍士有犯徑行斬首奉聖旨該部知道本部覆奉聖旨是

糾劾逗遛將官疏

題爲逆賊狂逞有日諸將觀望成風據實糾叅以肅軍令以靖夷方事臣聞事莫重於討逆法莫嚴於治軍播賊大逆不道自干天誅陛下不以臣爲不肖令督三省之兵進討臣書生也自惟懷鉛握槧之長非有躍馬彎弧之素豈能身犯矢石與逆賊相從事於顏行惟是仗九重之威靈申三尺之明法用以整齊諸將獎率三軍俾其有死之心無生之氣夫然後一鼓成功而元兇授首也乃諸將中有驕不可馴獷不可使逗遛觀望裹足而不前怯懦縮朒奉頭而思竄者臣不一明言之行見法紀廢弛卒伍渙散狂

賊得氣重地堪虞異日卽臣身當其罪然於國家何利焉  
除劉綎先令押兵回川防播後卽以爲四川總兵先限五  
月內到任後限八月二十日到任今九月行盡尙未到川  
臣方欲具疏糾之而會其差官具稟言於八月二十日到  
荊州二十二日發軍前行計數日發盡彼卽尾後前進據  
其差官稱綎擬於九月終十月初上任旣相去不遠臣姑  
待其至查有無別情再行具奏外若童元鎮自開閏月內  
卽以爲貴州總兵令不必候代至於今已半年矣廣西貴  
州壤地相接何事羈留於今不至臣自六月內卽移文貴  
州催之上任臣又以專轍督之至今竟無一字相聞

耳目塗塞不知貴州之急耶抑其畏賊如虎甯甘受後鑿之誅而一步不敢履黔陽之境耶據此退怯之狀卽受事亦未必可倚宜革任勘問方正軍法但臨敵易將兵家所忌且舊者已一朝不可復居新者亦目下未能卽至合再行嚴催赴任仍先革去職銜令充爲事官戴罪管事俟任後有功贖復有罪並論者也沈尙文原以貴州總兵革任候代夫所謂候代者欲其照常行事防守地方令地方不苦於無官乃有賴也而尙文自罷任之後杜門稱病一事不理逆賊流劫處處告急撫臣江東之使之以病辭郭子章使之以病辭臣移文使之旣不動身亦不同文最後貴



州危急之甚撫臣行令急備偏橋擁軍三千止撥一百人往彼身在銅仁是賊所不到之處也三千軍安所用之非其投占無人則其惶懼自衛將領若此留之候代何爲也哉尙不如逐之蚤去以一裨將待事尙得其三千人之用也蓋彼以爲業已罷任罪無復加故偃蹇無狀一至於此臣以爲貴州雖無陷城殺將之事而狂賊招苗出入無忌虜掠焚燬何可勝言此非尙文之罪而誰之罪乎似宜查照實職降三級仍行巡按御史勘明搶殺實數另行定罪者也曹希彬以原任副總兵令管綦江遊擊事後改任合江遊擊限九月初六日到任有信地有憑限星視視事何

說之詞其同領兵東征將官同川已久見在委用乃參移  
畏難避事行至夷陵堅卧不進且投一揭帖高自稱許謂  
其爲將三十年身經數百戰皆有成功聞常勝之家難與  
慮敵每每以此爲戒故不敢輕進其放言無忌一至於此  
尙知有人間羞恥事耶及查其生平原無甚戰功止以口  
舌得官朝鮮一行因人成事不覺矜而自功了無忌憚不  
知今日平播守須實守戰須實戰豈可以空言虛詞借耶  
梅鼎臣係臣標下練兵遊擊春間令坐鎮酉陽則忻然而  
往夏間令防守彭水則鬱鬱求歸後賊破綦江令守南川  
則往來府城同翔江上竟未一至南川之境當是時兵微

將寡原無可恃臣恐強驅之去不死則降故亦任其進退  
不復催逼彼一時也近調兵漸集以萬人付之鼎臣令其  
入守彼尙畏留不進強之再三始以一文報行期後訪之  
原未到南川止到木洞耳夫木洞者當賊破綦江南川人  
驚而逃盡縣官計無所出因移庫獄於府而身止木洞以  
其近江易於避賊耳今將官而亦欲避賊耶此二臣者在  
梅鼎臣臣已革其任但彼原不知戰難過責之合姑令同  
衛帶俸差操在曹希彬東征新回又虛張自肆若遂革其  
任彼以爲沒其勞屈其才强行揭辯後日且得鑽刺復進  
宜先以逗遛革其職令充爲事官仍守合江待剴時臣職

其稱否如不能守徑自更換別用候異日有功得以贖復有罪仍行重處者也嗟乎朝廷之待將領亦不薄矣世其官世其祿獲功則有陞廕恩榮之典死事則有恤錄廟食之報此亦何負於若曹而若曹利則爭趨害則爭避臨難則求苟免遇敵則求抽身小小建豎則以爲報之薄小小奔馳則以爲用之苦甚至妄肆狂言坐索高價如曹希彬之類者是尙知三尺法爲何物耶夫賊亦有何爵賞以待有功有何恤錄以償死士獨其所遣領兵者皆質其妻子於國而又身自持刀監押之其人降則懼沒其家敗則懼戮其身以故致死向敵無復他志今朝廷能生人殺人能

榮人辱人能爵人及於十世能夷人及於九族乃反不能如賊獲一戰之利則惟法之不行故耳臣請以後大小將領但有除之不來使之不動及一切偃蹇恣肆畏縮逗遛情態臣權其輕重輕則革其職任徑行更代重則一面收監一面具奏該部亦宜多發大小聽用將官於軍前以爲不時更換之用庶乎軍令旣嚴羣情自奮平定逆賊當不遠矣統乞敕下兵部議覆行臣遵奉施行地方幸甚臣幸甚緣係逆賊狂逞有日諸將觀望成風據實糾叅以肅軍令以靖夷方事理未敢擅便爲此具本專差承差高廣勳齎捧謹題請旨奉聖旨兵部看議來說本部覆奉聖旨童

元鎮改貴州總兵原旨著便馳赴管事不必候代如何至  
今未到君命嚴重軍機緊急恣意逗遛本當拏問姑念用  
兵之際革去總兵職銜充爲事官管總兵事立功贖罪沈  
尙文握兵未代責任在身如何託病閉門提兵三千只發  
百人赴急好生藐視憲法全無忠義之心著錦衣衛便差  
的當官校星夜扭鎖來京究問曹希彬梅鼎臣俱革職行  
督按官嚴提問報李應祥准以原官起貴州總兵聽用國  
家養士甚厚酬功不薄望濟不時之用各官平居驕蹇恣  
肆遇警畏縮遷延巧擇便利專圖推諉負恩玩法於心何  
忍軍法尤宜嚴肅以後故不遵的賜劔從事毋得姑息容

奸餘俱依擬

設監軍兵備等道六款疏

題爲瑣陳軍前緊要事宜伏乞聖明速賜處分以裨戰守  
以圖全勝事近因逆賊楊應龍大逆不道自取誅夷陛下  
不以臣爲不肖俾調各省之兵恭行天討諸凡軍中事宜  
節經部科之所條陳明旨之所裁斷不啻犁然具矣顧軍  
機最重軍事最繁凡一切大小機宜有裨戰守仍須議處  
者時時有之臣惟不文無能倚馬脩詞逐事陳請謹將近  
日應行事務彙爲一疏上希聖斷伏乞敕下吏戶兵工各  
部查照疏內事理逐一議覆得旨行臣遵奉施行臣愚幸  
甚緣係瑣陳軍前事宜事理未敢擅便爲此具本專差承



差齋捧謹題請旨

計開

一近該都察院左都御史溫純題設監軍等道該吏部覆於川貴二省各設監軍二道旋推參政副使等官張棟楊寅秋等計當不日到任惟是湖廣亦係用兵地方與川貴事同一體向因未設總兵故監軍憲臣亦未議及今該臣等議復總兵又該兵部先已題允業以陳璘充之則目前防守異日進兵皆獨當一路監軍之設必不容已陞自外省恐遠不卽至查有分守上荆南道參政胡桂芳才略有餘資俸已久應陞按察使令監軍事尙少一員姑以湖

北兵備道王應霖兼之其湖北守巡二道仍專司糧餉兵馬不得有誤大舉伏候聖裁

一四川省城有分巡川西道向來止管分巡不兼兵備彼時承平無事會省之內全無武備已非所宜况今軍興之際一切驗軍驗馬等項皆兵備道責任卽行之分巡道有類帶管殊非事體且各省會城分巡未有不兼兵備者獨四川爲然此亦偷安弛備之一端也合無將該道加添兵備兼銜目下軍前兵馬器械之事一切責之料理臣仍查其與各兵備道應分管州縣咨部更換敕書行事則日後川西地方亦且借其彈壓不爲無補伏候聖裁

一近該戶部議定湖貴用兵應發餉銀責令湖廣以節年  
派贍太倉餘銀十六萬零解四川以白蠟等銀九萬零及  
商稅銀一萬零並雲南借川銀十萬俱解貴州各軍前支  
用緣彼時湖廣未設官兵故令分餉二省今湖廣設有總  
兵自有重兵屯守所需餉銀必多豈可轉餉他方臣已行  
令將銀十六萬兩不必解川留於該省支用外近得該省  
撫臣支可大書言十六萬止一萬見在其餘及應解貴州  
白蠟等銀皆節年帶徵虛數非見銀也寇及於門兵次於  
野而旋徵多年之餉銀以給之豈能有及臣已行該省撫  
臣多方借處不得有誤軍興必須戶部查照臣近題應發

各省銀數別爲處給其以前帶徵錢糧不必作數庶幾師得宿飽敵愾有資伏候聖裁

一軍前所需鐵盔鐵甲火器火藥鉛子弓箭腰刀等項蜀中向來百無一備近該臣差官四外收買連夜製造然買者不能卽至造者不能卽完以七年之病求三年之艾其不相及明矣已咨行兵部求於天津咨取解送及轉爲具題於內庫給發但念自京抵蜀道里險遠若但以朽腐不堪充數豈徒無濟營伍亦且空擾驛遞必須所司選委能官逐項挑揀著實可用方行解發庶於實用有濟伏候聖裁

一陛下旣以討賊之事專責於臣則當局者止臣一人卽各省撫鎮止司一方至於監軍守巡各道副參遊守等官止司一事凡有應行事理應商推者商推應詳議者詳議皆須以臣爲定往見以前征討之事軍前文武等官往往不安職守妄生機械或於都門投遞揭帖或於道路布散流言暴已之長則以無爲有掩人之功則以是爲非以致黑白不分主持不定如先年甯夏近日朝鮮可爲明鑒合無嚴行申飭以後再蹈前轍在內聽科道在外聽按臣及臣不時叅論重處庶事權歸一展布爲易伏候聖裁一逆賊從來廣布金錢恣行結納利其有者初但爲之延

讐後乃爲之庇奸如先年薛亨之所糾舉近日本兵之所  
叅奏其百分之一耳今已罪在不赦計卽素有往來之人  
亦必改心回面幸其一日就死滅口之爲快誠恐尙有喪  
心病狂者入其籠絡爲之顛倒是非熒惑耳目以冀微倖  
萬一苟免滅亡若其計得行則三軍解體平定無期西南  
之禍計不旋踵可爲寒心伏乞天語申嚴開諭使天下曉  
然知君臣之義順逆之塗令卽有利口覆邦之人不至爲  
賊遊說自入叛黨然後大義昭明膚功可奏伏候聖裁奉  
聖旨該部知道吏部覆奉聖旨依擬行欽此又該兵部覆  
奉聖旨逆首罪惡滔天更無可赦軍中機宜悉皆責成總

督各官協謀共勦不許參差若有妄生機械流言遊說顛倒是非熒惑耳目的在內聽部院科道在外聽總督撫按不時叅來重治毋容姑息

調補監司道官疏

題爲道臣員缺數多懇乞亟賜推補以濟時艱並酌議綜覈有司以蘇民困事該臣會同巡按四川監察御史崔景榮議照今國家立法綜覈吏治至詳密矣有撫按以總之於上有守令以分之於下而又有藩臬二司以監理於其中蓋監司者上以承撫按之德意而下達之守令以流布於小民任至重也故監司得人則一路受其福監司非人則一路蒙其禍若監司缺人則撫按之命令無由下達小民之疾苦無由上通一路之害有不可勝言者此在居平無事然且不可況多事之邦軍興之際乎今西蜀不爲無



事矣監司缺人不爲不多矣除齎捧未同如熊宇奇陞轉未到如王道增張文燿康夢相傅良諫不敢槩瀆外如陳與相以調用而川西分巡缺胡宗洵李廷謨來三聘以被論而守北守東敘瀘兵道缺又崔斗瞻改之魏養蒙魏養蒙改之傅良諫傅良諫者咨文以爲參議邸報以爲副使二者必居一焉而守西巡北必有一缺夫一省之司道幾何而公出未回者一已補未來者四被論候處者三懸缺未補者一其左布政新任未補無論也此卽從容畫諾亦且不足況羽檄時飛四郊多壘徵兵理餉日不暇給獨以三五監司代攝其間一人之身印累累而綬若若其與濟

者幾何臣等欲聽銓部除補恐緩不相及欲調之各省恐遠不濟事謹於本省及鄰近省分方面中查其資俸相應賢能久著堪以填補者得數人焉如本省副使馬朝陽參議史旌賢陝西參政張悌河南副使王嘉謨直隸真定知府秦鄰晉陝西鳳翔知府汪應泰以上各官才守兼優聲實並茂或治兵理餉樹屏翰之績於一方或分符專城擅循良之名於各郡並爲緯武經文之器堪勝投艱遺大之司臣等第其才地參其俸資妄相擬議合將馬朝陽陞參政分守川北道史旌賢見委督餉合陞副使兼參議兵備敘瀘道仍兼督餉張悌以原官參政調守川東道王嘉謨

陞參政分守上川南道秦鄰晉陞副使分巡川西道汪應泰陞副使兵備松潘道至於守西巡北二道除傅良諫補一缺外應查其未補者何缺該部徑查資俸相應之人一併填補以上各道除本省外係外省者卽勒限行令前來到任係邊方者冬春之間虜不入犯亦令不必候代有遷延不至者令臣等叅究其齎捧未回如熊宇奇陞補未到如王道增等該部仍移文行催勒令速至庶監司不至乏人軍興大有利賴矣抑臣等尤有說焉政事不綜廢則不理人情不激厲則不興故惟賞與罰聖主所以勵世磨鈍而鼓舞一世者也向採木之事止於動眾勞民猶且每一

運完司道有司各有舉劾况茲興師討逆調兵買馬運糧  
治器何項不取之小民何事不經之有司有司智愚賢不  
肖人各不同諸凡勤慎公廉事集而民不擾與夫昏柔怠  
緩徒擾於民無濟於事一切情態萬有不齊若非握激勸  
之權何以集羣策屈羣力而收平定之效乎合候事甯之  
日除軍前功罪另議外其通省司道及各府州縣官員容  
臣等查其料理軍興事務有無遲誤有無騷擾分別賢不  
肖會行舉劾與薦者亦準作正薦庶乎甄別有方羣工競  
勸西事之平可計日而待矣統乞敕下吏部議覆施行臣  
等幸甚緣係道臣員缺數多懇乞亟賜推補以濟時艱並

酌議綜覈有司以蘇民困事理未敢擅便爲此具本專差  
承差李朝恩齎捧謹題請旨奉聖旨吏部知道本部覆奉  
聖旨是

增復府佐疏

題爲地方多故需人甚殷乞賜復設府佐員缺以便治理  
事據四川按察司兵巡下川東帶管巡上川東道僉事徐  
仲佳呈奉臣紙牌照得重慶府同知久缺業經會題以保  
甯府同知梅燮調補已行布政司轉行本官遵照開缺聞  
重慶府近有新任同知王陞已到任及查前題疏中有云  
若係懸缺今已調補者銓部已補有人令其赴省另擬報  
部等因今照該府原有安邊同知續奉裁革值茲多事之  
際一應計處兵糧分布機宜全賴府佐經畫合行查議仰  
司卽便議妥通詳等因云云隨據道府呈詳到臣案查先

准兵部咨爲軍務事該本部覆奉聖旨司道官凡係用兵處所的吏部就近更調有才略諳機宜的去府縣官許該撫按於本省內揀選調用欽此隨該臣會同前按臣趙標遵奉明旨議得重慶府清軍同知久缺合將保甯府同知梅燮調補其原係懸缺該部已補有人亦不必改除徑令赴川省臣等另查相應員缺擬補報部等因於本年九月內具題訖今據前因該臣會同巡按四川監察御史崔景榮議照重慶原係蜀東水陸要衝之地漢夷交錯之區近以播賊叛逆興師征討調集兵馬買運糧餉俱屯彼中凡點兵放糧察弊防奸皆賴府佐分理該府原設清軍同知

一員通判二員一督錢糧一司捕盜上年勘播之後議將捕盜通判裁革而以捕務歸併管糧通判所遺俸薪轉設安邊同知一員駐劄安穩地方繼以播賊出沒議於綦江添設參將領兵又將安邊同知寢革頃臣等因該府兵糧驟聚同知久缺未任遵奉明旨揀將保甯府同知梅燮題請調補先行到任管事今新任同知王陞續到據稱前任脩堤以致耽延茲道府呈稱本官頗有才能議將該府原裁通判仍舊議復就以王陞填補捕盜同知委於事體穩便理合具題伏乞敕下該部覆議如果相應將重慶府捕盜通判員缺准其復設捕盜同知暫以同知王陞就近補



任候播事底定另行議擬轉行臣等遵照施行庶佐職得人而民安盜弭矣緣係地方多故需人甚殷乞賜復設府佐員缺以便料理事理未敢擅便爲此具本專差承差李朝恩齎捧謹題請旨奉聖旨吏部知道本部覆奉聖旨是

褒廕將官疏

題爲播賊突衝孤城將官血戰陣歿乞賜照例贈廕以慰忠魂以勵羣心事據四川按察司呈奉臣紙牌先據兵巡上川東道呈報播酋楊應龍統兵於六月二十日逼近碁江遊擊房嘉寵并張良賢領兵出敵頗有斬獲苗兵退去至二十一日酋復統苗破城於城內大戰二將一齊陣亡守備胡汝甯入水渰死等因雖經本部院節次題報但各將志急效忠祇緣孤軍不能城守一時死節情實可傷仰司會同布政司查有何例議妥通詳具報其胡汝甯應否併議奉此又蒙巡按趙御史牌同前事依行布政司同稱

云云到臣卷查房嘉寵原係四川松潘漳臘遊擊該前撫臣調赴綦江領兵防守續又具題將本官加陞參將職銜隨該兵部覆奉欽依將本官陞補綦江參將移咨到臣又查得張良賢亦係原任漳臘遊擊因部兵與永甯禦虜土兵互相鬭爭本官同部兵斃傷土兵五命引因事威逼人致死非一家三命以上發邊衛充軍事例發遣後該布按二司議詳發於防播處所立功贖罪胡汝甯係石泉守備調赴綦江協守各行遵照間本年六月十七日據重慶府呈准房嘉寵塘報本月初三日據丁山里邊勇高仕偉等報稱楊應龍父子已出在點腳壩分兵三路初八日又探

得楊酋發兵劄住地名母渡三溪十三營職卽會同張良賢統率官兵隔河對敵當時銃礮打死射中數多拒敵至晚次日慮楊酋分兵侵縣內留家丁伏塘百總張喜等瞭見播兵由上流來圍一處對敵斬獲苗級三十名顆生擒五名其餘奔山入箐等因六月二十四日又據兵巡上川東道呈准房嘉寵報稱本月十六日偵探得播兵萬餘在趕水屯劄二十四營職會張良賢督率守備胡汝甯同官兵二千員名於十七日三更時分發家丁張喜等百餘令張良賢爲先鋒其餘官兵爲掎角已時抵舊東溪撞遇播兵一處對敵數陣就陣斬獲苗級一十二顆弩鎗銃箭俱

全追趕落水死傷不計其數其餘奔箐去訖在我全勝止  
將夷丁鐵兒箇赤家丁房甯戰馬二匹當陣倒死等因先  
後具報在卷今據前因該臣會同巡按四川監察御史崔  
景榮議照人臣受命於君惟職所在以死守之故將死綏  
士死鼓房嘉寵值逆酋之變身爲將領奉命守城則綦江  
固死所矣顧逆酋頻年以來逆節雖著剿撫無常尙未有  
殛言誅之者自飛練之役殺人如麻流血成淵惡極罪盈  
始有進剿之命然鳩將集兵尙須日時嘉寵身爲偏裨託  
之待命觀望遷延豈非常情乎而嘉寵則以人臣無將將  
則必誅且旣已名其爲賊豈復宜與之俱生蓋滅此朝食

之志自其由漳臘調綦江業已定矣故酋以賄來則卻之  
以使來則斬之懸賞招降張榜征討其視應龍居然禪中  
之蠹豈其不知彼已而甘與爲敵忠激於心義形於色直  
欲捽逆賊而平吞之一何壯也張良賢以松邊名將馘虜  
有功詎誤謫戍領兵協守至綦纔數日值應龍逆謀旣就  
悉師以出二將遂列陣相迎自爲犄角轉戰於三十里之  
外良賢殺入重圍出而復入者三次後以勢不相當始議  
城守終以孤城無援奸細乘之遂身與城盡亦足悲矣初  
聞賊欲破城有爲嘉寵計者欲移家他方身自爲守嘉寵  
毅然曰我爲主帥一移家人心遂搖城誰與守死則闔門

死耳比城破乃自殺其妻而後以身殉城張良賢見城不  
守欲刃其妻其妻曰爾自戰吾亦鬪賊而死遂持刃向賊  
眾爲披靡旣就執賊眾義而釋之嘉寵之子亦俱無恙此  
豈非忠臣義士自有神明陰相爲護其家令不獨全其名  
乎二將已矣今城守漸完勁兵畢集逆賊授首當必有日  
恨不令二將揮戈其間然要以稔賊之惡甚賊之罪起懦  
夫之志激壯士之肝自二將之死始亦曷可無此死也胡  
汝甯計無復之投水而死等死耳胡不以一矢相加遺尙  
獲戰死之名夫死有重於泰山有輕於鴻毛奈何其不善  
處死蓋其爲國捐生亦自死於王事獨未至轟轟烈烈如

二將耳看得原任參將房嘉寵原任遊擊今充戍領兵張  
良賢忠堪貫日氣可成虹提一旅以捍危城率孤軍而當  
大敵斬將搴旗一代之英風不泯成仁取義千年之俠骨  
猶香宜有特褒用酬奇節合無敕下兵部查照節年事例  
議覆將房嘉寵照原官加贈三級張良賢復原官量贈二  
級各廕一子本衛百戶世襲仍於綦江地方立祠有司春  
秋致祭比於巡遠之雙廟其胡汝甯通侯查明止照陣亡  
事例施行庶大義昭明羣情奮勵平定有期奏凱可冀矣  
緣係播賊突衝孤城將官血戰陣歿乞賜照例贈廕以慰忠  
魂以勵羣心事理未敢擅便爲此具本專差承差李朝恩



齋捧謹題請旨奉聖旨兵部知道本部覆奉聖旨是

增楚省監軍將材糧餉開款疏

題爲播惡已盈大征宜亟遵旨議增兵餉併舉用將臣以  
彰天討以戢禍亂事准湖廣撫臣支可大會蔡內稱先該  
臣於楚省防播協征備兵一萬計餉一年已經題請復額  
編征僅得六七萬兩之數耳近復奉有明旨特諭湖廣與  
貴州各兵俱准添補又令湖廣堪動錢糧准先動後題伏  
讀綸音具見聖明加嚴於薄伐討罪之舉而又軫念全楚  
兵食之難繼也敢不仰體宸衷悉心籌畫求爲制勝萬全  
之計等因備移到臣該臣會同巡撫湖廣等處地方提督  
軍務都察院右僉都御史支可大巡按湖廣監察御史王

立賢巡按四川監察御史崔景榮議照播逆楊應龍上負國恩橫肆狂逞一歲之中在黔敗劫於飛練在蜀殘破於綦江楚之偏橋近聯播境時見憑陵邇復遺書內地聲言入犯譁張嫚罵侮及三省以此情形之叵測亟宜聲罪致討而不容養寇以貽患者顧湖楚旣患無兵而又不肯借兵於諸路最苦乏餉而又不能求濟於他省臣化龍已經題議楚兵宜用四萬餘矣計餉宜先給三十餘萬矣若非就近區處用備策應雖欲併力西向爲大征計將奚賴乎所有糧餉之當留用兵士之當調募與夫監兵營餉則道臣之宜擇也摧鋒抗敵則將材之宜舉也行張帝按二司

詳議相同又經臣等覆查無異謹開列事款條議上請乞  
敕吏戶兵三部再加查覈覆議遵照施行庶犄角之勢易  
成而蕩平之績可奏矣緣係播惡已盈大征宜亟遵旨議  
增兵餉併舉用將臣以彰天討以戡禍亂事理未敢擅便  
爲此具本專差承差李朝恩齎捧謹題請旨

計開

一議留兵餉竊惟六師旣興餉卽隨之湖廣設兵四萬先  
議給餉三十餘萬者特爲目前進剿之計耳今尙有將領  
各官廩糧與夫器械火藥工價等項俱不與焉楚省錢糧  
多係起運南京本折銀米與川貴不同今又採買大木庫

藏撥括一洗毫無別項堪動銀兩臣等焦勞苦索計無所  
之行據布政司左布政使胡心得清查郡邑委無措處僅  
查有二十七年分額解漕折銀二萬六千四百一十四兩  
二錢太倉銀二萬四千兩派辦供用庫茶蠟等銀一萬五  
千四百三十三兩六錢續收國用詘乏乞查稅契銀兩以  
佐軍興事例稅契銀九千七百三十二兩南京戶口正扛  
銀八千五百九十三兩二錢北京乾魚銀二千七百九十  
四兩一錢及巡撫與巡按衙門解京贓罰銀八千兩又各  
司道解紙贖銀一千一百八十兩值此兵餉急缺不得不  
請留爲大兵糗精之需此外尙多不足之數容臣等再行

酌處或議借留另報仰乞皇上俯念湯沐重地用兵重務將前項各銀聽該部議覆俱准充湖楚餉兵之用一俟播平之日仍照舊額盡數解京伏候聖裁

一調募兵士竊照楚地承平日久武備素弛卽各衛所額設軍兵僅足戍守城池及江湖各哨兵役止堪防守汛地若使披堅執銳以抗大敵無異驅羣羊而攻猛虎矣近臣化龍會題湖廣設兵四萬餘名此非貔貅之士勇悍習戰者不可用也查得上荆南守巡道報有施州衛散毛容美等土司各土兵宜調用一萬名湖北守巡兵道報有保靖司麻陽等土兵宜調用一萬名又辰沅兵道報有見調鎮

軍營鎮溪所及沅靖等兵各哨殺手見調守禦偏鎮者併  
召募民兵共一萬名應天鳳陽等處京營淮陽等南兵一  
萬四千名通共四萬有奇俱堪調遣但臣查得施州衛散  
毛等司土兵未議之前先已調取就近入川分布涪彭防  
禦難以撤移應天淮陽等處南兵項亦該臣具題請發近  
經科臣議及不知部覆果否允發此二項既難作實數則  
該省應發之兵尙少二萬應於該省鎮軍鎮溪武岡麻陽  
等處土兵再調一二萬充足前數俱責令彼中原管將領  
頭目嚴加約束齊赴沅州俱候總兵官陳璘到彼督部分  
布聽臣傳檄三省大兵刻期征剿仍令撫臣一而調發合

應題請乞敕該部再加申飭庶師出有名而三軍用命矣  
伏候聖裁

一監督兵餉竊照全楚幅幘最廣距蜀道里更遙取解一  
應兵糧非有專官監督約法難於畫一况今議動大兵四  
五萬齎糧三十萬紀律不容不嚴衡量不容不密其監軍  
督餉之重寄委任誠不可不得其人也先該部院會議於  
川貴二省各請設監軍二員又該臣化龍查得湖廣旣設  
總兵集兵三四萬獨當東路一面之寄監軍尤不可少隨  
查有分守上荆南道參政胡桂芳才識超羣且資俸已深  
應量加按察使職銜令監軍旅之事尙少一員又以湖北



兵備道副使王應霖兼之業經具題訖今撫臣支可大會  
議以分巡荆西道右參議兼按察司僉事魏養蒙監攝兵  
務分守湖北道右參政詹啟東督理糧餉各加銜管事緣  
二官一則謀猷諳練一則精敏端嚴委之各務俱稱其任  
第臣前委者乃胡桂芳王應霖而撫臣今委者則魏養蒙  
也各官才品俱屬相應止因彼時見報魏養蒙方於四川  
推用故不議及今照該省距播邈遠止一監軍往來計畫  
實難應酬兵備自有信地帶管不專亦爲不便似宜仍設  
二員一隨撫臣贊理機務一與總兵陳璘隨營運籌卽將  
胡桂芳魏養蒙各任監軍則分任既定事功可集矣其王

應霖行令止任兵備事務免妨職業相應題請乞敕吏兵二部再加查議合無將胡桂芳與魏養蒙俱准監軍詹啟東督餉候平播有功一併優敘如有疏曠不職仍聽據實叅處庶事有專責而兵糧不致匱缺矣伏候聖裁

一薦用將領竊惟楚故用武之地謀臣猛將古不乏人而今未嘗求之不可謂下無其材也况茲征播之師實係干城之寄雖衛所江防武弁如林而素不習戰奚可使之遽當一面乎臣等隨行各司道多方諮訪所屬將領無論投閒廢棄舉其謀勇兼資者今得三人焉武昌衛原任四川行都司僉書吳時喬材貌俱雄韜鈴夙裕西蜀功多保障

專闔力可折衝原任薊鎮南兵遊擊柳邦奇學書學劒乃武乃文氣陵貔虎千羣胸藏甲兵數萬襄陽衛原任四川遊擊王一桂虎視英標鷹揚偉略履戎行如飛電譚孫吳若懸河以上三臣或以病歸或以過棄然皆已試將材爲眾推轂可復置之行間以應登壇之選者也乞敕兵部再加查議如果其材可用合無將吳時喬柳邦奇王一桂各以原官責令提兵振旅分布沅州偏鎮等處俱聽總兵陳璘督部進戰俟平播功成分別敘用則分閫得人而敵愾有賴也伏候聖裁奉聖旨兵部知道本部覆奉聖旨俱依擬行

## 互調州官疏

題爲遵旨更調州官以安地方以濟時艱事准兵部咨該本部覆奉聖旨司道官凡係用兵處所的吏部就近更調有才略諳機宜的去府縣官許該撫按於本省內揀選調用欽此該臣已將本省府州縣有司官員第其才品查照資俸會同前任巡按御史趙標逐一擬定地方更調具題去後近又查得重慶府所屬涪州乃川東水陸交衝之地而播賊出沒之區也目今屯糧積草治兵繕器安內攘外百務交叢此非尋常才調可以勝其任者該州知州陳良模向當初至頗亦覺其不宜於繁劇尙意其久之儻或練

習尙堪器使乃今旣數月矣酬應頗遲事務漸廢卽買米  
運糧種種皆無成效久之恐誤軍興於地方不便於本官  
尤不便蓋本官者平易近民安靜不擾若用之簡僻無事  
之邦不失爲清淨甯一之治惟此時此地大不宜耳及查  
得巴州知州陳敬衷賦才爽朗莅事精勤巴州僻地未盡  
所長用之涪州乃爲相稱應與陳良模互相更調爲便該  
臣會同巡按四川監察御史崔景榮議照二官者一則地  
浮於人一則人浮於地仍舊則敬衷有驥足不展之嗟而  
良模有綆短汲深之患互調則巴州享和平安靜之福而  
涪州無廢墜叢脞之憂除已行令二臣更換到任管事外

合行具題伏乞敕下吏部照擬上請行臣等遵奉施行庶  
繁簡得宜安攘有賴矣緣係遵旨更調州官以安地方以  
濟時艱事理未敢擅便爲此具本專差承差鄧一安齎捧  
謹題請旨奉聖旨吏部知道本部覆奉聖旨是

## 擒獲奸細疏

題爲將官陸續擒獲姦細斬獲助播小苗類敘奏報以作士氣以消姦黨事案查萬厯二十七年六月十八日據防守黃平參將劉效節呈黃平所把總李朝陽等領兵於本所軍人陳旺家拏獲陳守邦吐稱王表係邦姐夫舉家般投播州楊應龍將王表安於養鷹局住坐至二十七年三月內差王表來黃平探聽消息表又同黃平司叛投播民吳志俸等在四牌謝朝俸處借苗兵三百名於浪洞平溪等處燒劫屯寨閏四月初三日半夜表帶刀弩箭筒至黃平岳母唐氏家歇宿說楊應龍差來探聽黃平官兵虛實

初四日在陳旺家藏躲被官兵於牛圈內搜獲將王表監候等因本月二十九日又據平越衛申報本衛管下水洞夷頭阿亮等稟報本年五月內有飛練殺官反頭盧阿反與我大架寨相殺阿亮將盧阿反射著重傷二箭未死又殺他大老虎阿寅等小軍六十餘人等因八月初四日又據防守偏橋原任清鎮守備今聽勘史良將稟據偏橋衛報本年七月十九日被白泥司土舍楊通定楊七等統領黃岑等寨數百攻圍本屯捉虜男婦有鄉導屯老劉念還等稟稱前賊必往梭洞過河回寨乞發兵堵截卑職親統練兵把總葉正陽曹仁佐哨官羅國器石萬龍葉占春武



生王嘉賓等帶兵伏捕至二十一日早果有多苗牽牛擔担至校洞經過截殺拒敵就陣斬獲首級二顆奪獲牛一隻刀弩等件天已近暮苗奔入箐難追回營等因本月十七日又據石阡府經歷陳廷範申據本府水口渡住民彭希順等拏獲細作馬良貴到職供係楊應龍差來石阡探聽楊應龍將四牌夷頭莫老明家口拘入播州要出攻劫各處地方等情將馬良貴監候等因本月二十一日又據帶管都清兵巡驛傳道副使尤錫類呈准參將劉效節移解拏獲奸細杜老冬到道審稱係四川人般在播州地名大竹園住坐於七月二十一日謝朝俸諭令來黃平探聽

軍兵多少回話又稱楊應龍打破綦江廢了些兵水泮死些今要來打黃平屯堡割了田禾然後打城又撥朱老二來幫謝朝俸今被兵楊再東拏獲審據楊再東稱老冬原虜再東在肆牌後再東偷走回黃平今遇老冬來黃平探聽在街撞認拏獲等因本月二十二日該臣訪得貴州省城居住舍餘吳塑父子交通播州牌行都布按三司拏獲會問得犯人張五十係貴州前衛舍餘招稱五十先年不守本分慣住夷寨買賣就不合故違雲貴等處但有漢人交結夷人互相買賣惹釁貽害地方者問發邊衛充軍事例卽潛住播州投見楊應龍有貴州衛未獲舍餘吳塑卽

吳應舉與已獲男吳二弟吳三兒各習塑神像張五十引去播州見楊應龍母令塑羅漢觀音等神像去久未同至二十七年四月內吳應舉令吳二弟吳三兒回家看視八月初一日吳二弟與吳三兒因爭分祖遺弓張互攘吳二弟罵吳三兒不知你將父殺在何處吳三兒回說你也同去如何說我彼此攘罵致將通播事情傳聞貴州士民恐吳塑將來爲內應投揭撫院八月二十二日蒙行三司拏獲五十與吳二弟等到官發貴陽府引例問擬五十與吳二弟吳三兒各免徒發邊衛永遠充軍發遣吳二弟監故張五十吳三兒仍監候九月初六日據石阡府經歷陳廷

範申據葛彰司生員安啟於九月二十八日拏獲四牌夷犯李貴到職審得本犯供係播州琵琶坪住人本年同李信并苗頭石勝鳳石富父子逆黨米東等到葛彰司將三渡落田等屯軍民財畜盡行劫去被害良民楊再禮等識認是李貴兄弟後因外兵四集李貴等將男奔出外境被楊再禮等拏獲申報等因九月二十九日據參將劉效節呈把總王嘉賓於梭洞要隘把截本月二十一日有九股兇苗數百入播經過本洞地方帶兵對敵斬獲苗級二顆驗明等因十月初一日據帶管都清兵巡驛傳道副使尤錫類呈據偏橋衛呈據楓香小水等屯軍餘謝義高等稟

稱九月二十二日被白泥司土惡楊七等統兵攻圍各屯殺死軍人李珠等四名捉虜軍人鄺廷臣等家財牛隻當有鄰近侯家屯舍餘侯世元等督率鄉兵救護陣斬苗級一顆等因本月十二日又據分守新鎮道右參議梁銓呈據防守清平重安江把總楊國宏於本月初三日午時被苗賊衝突劫殺督兵斬獲苗級二顆生擒一名阿利連人呈解等因十月十六日又據參將劉效節呈據黃平安撫司土同知楊位呈據目把劉桂等報稱十月初六日播惡楊應龍總管楊三楊七統賊數百燒虜白株等寨桂等同把總薛瑞分兵截殺斬獲賊級二顆鞍馬二匹槍旣等項

奪同被傷男婦三十餘口等因轉呈十月二十七日又據參將劉效節呈據黃平把總李朝陽等拏獲姦細郭天祿郭天俸隨帶兵書該職會同通判王三策審得郭天祿郭天俸稱係浙江衢州府龍游縣人一向常住播州熟識與楊七交好今年二月內楊七差江西人徐伏五前來同往京回欲進播州先令徐伏五回播聽接天祿十月十九日由白泥進播經過濫橋被兵盤獲審天祿稱我平生智大善用諸法陣戰遯術黃平土城何足爲懼我將北門河水湧逼架起雲梯雲車火器頃刻見功若放我將楊應龍容易誘出又檢行李內有天文地理圖二張通天竅一本古

風一本火器攻城書一本羅鏡一箇軒轅小鏡一箇虎鈴  
摘要天機統會集一本五經標題書一本觀象玩占書一  
本紫薇垣經一本大明一統紀要敘二本楊應龍給發刊  
印細字程途一條大小圖書三面雕刀紬衣等項人贓併  
連解審等因十一月初四日又據參將劉效節呈據防守  
梭洞哨把總王嘉賓東坡哨把總蔣奇功帶兵伏監拏獲  
苗賊阿寶阿桑老二供係叛酋楊七管下黎山新寨苗人  
因四牌夏金虎領我苗種一百送老苗一千同九股行至  
釘靴沖不想官兵截倒殺傷苗人我三人迷路連夜奔到  
營邊拏獲等情連箭弩刀縣被一併連人解審等因本月

初六日又據參將劉效節呈據黃平所掌印千戶褚綬呈據夷頭阿保等把截草塘要路十月二十七日播州叛苗謝朝俸帶兵三百餘人殺虜平越松坪堡虜去男婦一十四口家財等物本堡軍人王張生等來報保兵追截敵殺斬獲首級二顆奪回被虜男婦一十三名口當交原主止虜去一口殺傷被兵三十餘人我兵亦傷二人等因呈詳到臣臣等陸續行司道將已斬級者驗實懸示已獲審明者牢固監候各將官兵量行獎賞外案照先該臣訪得播賊因見川省設兵有備無能竊發乃以目把奸徒裝扮漢人出入黃平偏橋一帶或招苗劫掠爲害或打探遠近情



形亦有內地軍民利酋金帛所引或潛蹤影迹與人走透消息甚至以違禁硝磺鹽布等件攜入爲奸者牌行貴州按察司并守巡兵備等道及轉行將領等官各將鄰播一帶要隘地方嚴加把截盤詰奸細如遇播苗出沒併力擒斬有功員役先行犒賞事完優敘設或怠玩從重究處各等因節次申飭去後今據前因該臣謹會同巡撫貴州兼督理湖北川東等處地方軍務都察院右副都御史郭子章議照賊自綦江之役不敢復入四川獨以貴州兵力單弱故姦細往往出沒其間乃貴州地方拏獲姦細共七起多在黃平平越之間是賊所垂涎者意可知已而郭天俸

兄弟以異省亡命不遠數千里來助叛黨所攜諸書盡皆  
兵家詭秘之冊則姦細之魁者幸而見獲姦謀稍阻今已  
審明相應與馬良貴王表杜老冬李貴阿利阿寶阿桑老  
二張五十吳三兒等分別情罪或斬或戍以消姦黨者也  
斬獲小苗功雖不多然自飛練喪敗之後我軍氣不揚而  
賊氣日驕九股黃峯寨諸回牌七牌諸苗助播爲虐往來  
充斥於偏橋黃平之區神人無人之境莫敢誰何自阿亮  
射中盧阿反雖未即死而傷已甚此後梭河新獲二起黃  
平侯家屯重安江寧等處新獲四起長安稍獲數阿亮等保等  
與史良將李朝陽王嘉賓等功應卹賞以作士氣者也夫

細作甚微苗功甚小臣等非不知瑣瑣者不足以瀆天聽而必爲之敘報者功無微而不錄則人知建功者必不遺而益勸於巨賊無細而不誅則人知助惡者必不赦而漸散其黨未必非鼓舞人心之一助也伏乞皇上敕下兵部覆議行臣等將郭天祿杜老冬等明正典刑張五十吳二弟等遠戍遐方將阿亮阿保史良將李朝陽王嘉賓等分別獎賞庶刑賞旣明士卒益奮矣緣係將官陸續擒獲姦細斬獲助播小苗類敘奏報以作士氣以消姦黨事理未敢擅便爲此具本專差承差鄧一安齎捧謹題請旨奉聖旨兵部知道本部覆奉聖旨是

議處貴竹懦將借給餉金疏

題爲播賊狂逞未已貴竹物力難支伏乞聖主處懦將給餉金並議責成分任以振軍威以圖全勝事萬曆二十七年十一月十一日據原任鎮守四川總兵官劉綎呈據領兵防守南川原任遊擊王之翰報據把總劉添忠等探得楊應龍見在點兵三日令各帶米三升火把三束欲出犯境至初五日夜一更時分酋果發兵二萬剗在地名官壩與南川綦江相連盡將連界人民房屋燒燬其東鄉兩山人戶見勢重大黃夜般逃一空又有逃出播民游七來與東鄉邊勇范玉正報說楊酋自領萬兵欲出婺川眞州如

婺真有兵必是來攻南川十五日又據江津縣申據棋盤  
三教等堡黨正詹袁塘報稱探得楊應龍令目把口頑等  
領兵萬餘於地名丁山壩劄守離棋盤等堡四十餘里不  
知出何地方又據哨探王時益報稱酋令提調何延順領  
兵一萬劄守扶歡寨又據塘報官朱自強稱據播州逃難  
人王時探得楊酋發牌一張內稱爲出巡事往因難奴誣  
害捏聳妄奏至設防守豈肯甘心本司的於本月十九日  
點選十三種苗兵百萬出外清理疆土各立界限牌仰丁  
山小溪等里提調坐寨周承榮等卽將各里頭目前兵操  
練聽候調用儼有阻撓尋一對頭牌至松坎驛紮紮軍前

來二十三日又據塘報官岳鳳鳴報稱楊應龍差心腹頭目傳諭各邊夷目叫他各人面降心違待大兵擁於深巢督起部兵近貴者卽劫貴州近湖者卽劫湖廣近川者卽劫四川各所運之糧仍令四面羣起攻打州縣本身自敵劉總兵弟男分拒貴湖永甯要路又稱近日南川酋劄之兵俱是木人空營夜間令人放火白日無兵二十四日又據本官報稱探得永甯宣撫司長官王堯王甫松等領兵防守本撫連界播地三鍋莊柏楊坪本月初三日播目楊丑兒領兵臺船十五隻前來偷路攻打鄰衛屯堡王堯等率兵截路斬獲首級六顆箭傷漂流河水者不計其數四

路追趕已入播界二十八日又據監軍道并總兵劉綎副總曹希彬各塘報探得播賊分付目把不要離心待夷兵養就銳氣一同衝出徑到重慶又稱賊見南川有官兵要暗發兵三四萬到彼又連日發有縣絮槍弩等件迭在營中及分付官壩頭目暗地探聽南川官兵劄有幾營且不與鬪待看何如略將些兵哄他起禍然後纔動手叫新官出眞州千歲出官壩齊攻南川方往別處同日又據總兵官劉綎呈據防禦合江副總兵曹希彬揭據塘報劉慶報稱前去播屬龍門里長官袁年處探得袁年差人赴楊應龍處所聞說應龍分付各領兵頭目說你等不可離間

心腸前日毀了綦江此是你等之意若朝廷征我我就爲首你等爲從又豈饒過你每不要亂聽外司愚惑可將部下夷兵養就殺些官兵使各路把守漢土官兵俱各退散等朝廷再起人馬復來征我又有四五年那時別尋道路十二月初六日又據貴州布政司呈據防禦黃平指揮徐登階稟稱十一月十九日未時探兵李孝報稱播兵數萬由白泥出小大章劄營至申時又據夷頭阿保等報播兵五萬由構皮灘過渡出苦菜坪到白泥劄下又據天邦兵等報播苗在附近興隆臺坡劄三大營八小營申時又發探馬五隻來黃平大路長沖哨探有大翁鋪軍民驚慌般



移等語查得各起稟報兵情乃黃平四面隘路探報人役俱在本日本時如出一口且黃平在播苗夷巢之中防兵不過五千據報苗兵甚多恐眾寡不及事勢然眉伏乞速令安疆臣遣兵由沙溪入播襲後庶興隆黃平之急少緩同日又據按察司呈據興隆衛東坡堡軍人李萬等飛報播兵數萬徑出後洞圍殺白田乾溪水口黃眼等屯燒虜人口房屋卽今糾合容山九股等處叛苗攻打興偏黃平本月初七日又據該衛報播賊統兵攻東坡爛橋欲攻衛站隨執木刻上寫播州把總隆諭興隆通衛官民吾今督兵數萬追尋叛逆行至東坡被流徒集兵千餘截殺勢不

得已定決雌雄近查姦徒馮權張熹何以爵潛入興隆爾等早要發出以免刀兵如執迷不發親統大兵臨衛玉石不分等語今播賊屯兵離城五里日集添兵上阻重安下拆偏橋黃平中攻興隆徑通九股以爲大逆請將發兵救援初八日又據上巡東道并總兵官各呈據防守南川遊擊王之翰報據塘報宋友向等報稱播州夷人猶朝與夷頭喻應龍有隙朝遂糾合綦民趙黨等百十餘人偷打應龍寨分激動官壩何提調遂統馬軍五十二匹苗約二千前來燒劫綦江民羅啟初南川東鄉邊民方華山等數十餘家爲應龍復讎當得原差在彼塘報官兵聚集邊勇追

趕放礮各苗退散及查播惡猶朝與喻應龍有隙致動酋兵殃及綦南居民且幸職發有塘報官兵數十往東鄉哨探得以聲援致酋兵驚退卽欲提兵前去第恐張皇不免挑釁且苗兵懼怕已經走回官壩去訖除整兵以備不虞外本月初九日又准貴州撫臣郭子章咨據興隆衛申報播兵攻圍東坡聲言攻打興隆黃平衛所又據都清兵巡道并黃平所申呈俱同又據分守新鎮道呈稱播賊將東坡等處攻殺各兵剗營於十里橋阻塞偏鎮音信不通乞發官兵應援等因除調各衛所官兵及安疆臣羅兵前去救援去後該本院看得貴州見在之兵已有二萬九千零

近調雲南兵七千廣西兵一萬湖廣永保兵一萬分駐各衛爲遊兵而尙未至今東坡之賊不退則楚黔之路不達京餉六萬尙阻於辰沅廣西福建二十萬之餉卽至亦不能入本院意欲於川中借十萬卽以福建十萬金解補滇中借銀十萬卽以廣西十萬金解補已經具題外合行移咨檄行四川布政司將庫貯餉銀借九十萬兩差官解赴貴州濟用候咨福建軍門轉行福建布政司將應解貴州餉銀十萬兩徑解四川布政司同日又據貴州按察司監軍按察使楊寅秋呈據新添衛呈稱本月二十七日亥時蒙防禦平越蔡參將差兵魏萬一齎執飛票稱播兵數萬

攻陷王嶰聲言往新添攻打屯寨等因行衛加謹防範圍  
隨據本衛那押夷民報稱播兵數萬已將王嶰燒劫盡空  
且王嶰由小路逼近新添三十餘里乞發羅兵數千把截  
馬鬃嶺要路并賞千名防禦卑衛等情又據本官稟稱賊  
之先發以疲我奔命犯黃平殘東坡睥睨興隆城池總之  
欲糾拽九股生苗歸巢爲援耳近聞大營已撤止留小營  
十數每營約七八千名懼我兵之躡其後也梁參議同徐  
同知於本月二十四日已脫興隆出偏橋彼中雖亦有苗  
報而都清書吏與梁少參同時出城來省者其言則約若  
新添之報或是近苗剽劫假播聲言第有苗情實未可  
之

據鎮守貴州總兵官童元鎮稟稱職服役代後適值平頭  
報苗賊出劫遂就近入銅仁暫爲調度圖趨省會撫按司  
道商推機宜各等因到臣該臣已將永甯獲功長官王堯  
等量加犒賞及屢經申飭川湖貴州三省監軍守巡兵備  
等道各路領兵將領等官并永甯土官奢世績水西宣慰  
安疆臣一體遵照嚴加隄備多方偵探賊如入犯則相機  
截殺設若不動則斂兵固守稍俟湖廣兩省兵糧畢集進  
剿去後該臣看得賊自六月間殘破綦江以來興兵造逆  
已半年於今矣皇上赫然震怒大發海內之兵責臣以征  
討之事臣感激恩遇勉竭庸駑日夜淬礪東向而圖之以

土兵難以全恃也故請大發邊腹之兵以三省難以自給也故請多頒內外之餉以招苗之路宜絕也故請置偏橋之師以黔省之力不足也故請責全楚之供蓋帝王之道出於萬全必俟物力齊兵將集萬全無害然後一舉而撲滅之計少假時月賊當無能自脫者賊見此舉動亦知事在不疑顧困獸思鬪尙冀一逞乃四川兵力已足自固故賊一犯永甯而卒以北再窺南川而竟不進遂轉而之貴州矣貴州爲招苗之路賊所必由總兵舊者已去新者未來兵力尙單衝突爲易故狃然狂逞一以招苗爲羽翼一以示武於遠邇遂致道路不通土民震恐先據貴州司道

連報賊勢披猖臣計遠水近火不能相及今發川兵往援已遲何況外省因一面行二省鎮道嚴行備禦一面行安疆臣奢世績發兵直搗其巢而貴州撫臣亦發安氏省城防守之兵萬餘令王嘉猷將之往援播州非水西之敵計當斂退近據監軍楊寅秋所報賊勢似已少斂道路似已漸通除再嚴督二省鎮道督兵夾剿嚴查各處焚掠另行奏報其外省兵惟河南二千已到陝西各邊六千已先後入境尚有浙江雲南廣西兵業已數次行催據該省撫臣劉元霖陳用賓楊芳各報已經督發計當不日可至顧臣力之所能爲止此矣乃尙有所當請者三則黔帥之當處



也黔餉之當議也楚省當事諸臣宜戮力同心以襄大業而不當以緩急分爾我也夫沈尙文章元鎮皆黔中大帥也貴州總兵先年苗事急則當駐銅仁近年播事急則當駐偏橋臣等已於七月間已題貴州總兵移駐偏橋矣沈尙文雖經革任尙候代八月有餘曾一步至偏橋乎乃童元鎮猶可異矣臣等竊議湖廣總兵駐偏橋貴州總兵駐興隆平越今賊犯興隆矣童元鎮已到猶駐銅仁託之乎有苗警卽有苗警豈復有大於興隆者而可以棄之不顧乎卽如今四川總兵不於重慶到任而尙之松潘託之虜警可乎不可乎當羣苗充斥之時居然避信地而視之不

知元鎮誠何心也臣以爲二將之罪惟均而元鎮以新總兵踵舊總兵避事之套尤足駭異似宜將尙文重處元鎮方在事若再革之無論目下無人可代彼與沈尙文先後釋重負而樂晝游不啻登仙他人必有垂涎效尤者宜姑如臣原叅革其職充爲事官令竭力討賊若敢以被叅爲詞稱疾杜門或異懷不任卽容臣徑自提問擇一裨將代之此不但爲元鎮一人亦以警後此而效尤者所謂懦帥宜處者此也年來用兵西事至費銀二三百萬東事至費銀五六百萬今播事不下於東西二賊也臣僅以百萬請而戶部難之川貴止各發寺銀數萬尙未到湖未有給焉

貴州所發外省銀四十萬在滇楚者二十萬已成烏有閩  
廣有無亦未可知貴州撫臣計無所出乃請於川中借十  
萬又指閩中之十萬爲償臣明知川中非可借人之時顧  
事已至此剗肉補瘡何所復吝已行布政司措處陸續發  
解然計此而後兩省均受其敝矣川中即可派徵黔中何  
以措處卽部文曰三省通融然蜀之派僅十二萬楚之派  
僅二十餘萬此亦何堪通融乎黔中止以無餉故未敢多  
募兵今雲南廣西之兵且至數千里遠征士兵豈能枵腹  
而應敵乎不獨外患且有內憂萬一脫巾而呼慮不在賊  
矣事固有以小吝而成大費者臣竊懼之宜令戶部亟行

議處必須閩廣二十萬俱爲實數外更益以別省見銀一  
二十萬庶可支持目前所謂黔餉當處者此也偏橋楚地  
也其軍食糧於楚其官支俸於楚貴州但遙制之耳故偏  
橋之備宜全屬楚夫楚止備偏橋則於其地置萬人不已  
足乎顧偏橋走全楚之道也偏橋不守則禍中於全楚矣  
故宜以全楚之力夾剿而後楚可長無後患臣所計該省  
集兵三四萬行剿乃代楚人自爲計非令代二省舉事也  
第見楚中各道若舍已而耘人者臣行備三萬人多半年  
之食而止備米三萬則三月猶未足而尙未運至也臣行  
募調兵三四萬而尙不及其半且守偏橋者尙不及五千

臣不得已經調永順兵一萬保靖兵五千及令招募鎮溪  
辰沅並調十三哨烏羅及五司僸兵共湊三萬以上亦不  
知能如額否卽兵至亦不知食可常給否今川兵將足貴  
兵亦漸有次第獨楚中之兵外調者旣經科議以爲不宜  
本省者又未能保其果否足數不日二省兵齊待之則日  
費不貲舉事則一隅有缺當爲全師之累矣且陳璘不日  
當至令之何以措手夫兵尙可以催督而來可以鼓舞而  
用惟本折糧餉非可以空言虛辭借者今內而該部稱乏  
外而該省稱苦已無望其助黔其何計以張楚臣初以皇  
上旣假臣以便宜卽宜徑自多方催調何敢更有虛實乃

數月以來外省兵且漸至惟楚中紙敝墨渝輪蹄交錯竟茫然無一實效臣爲之食不甘味寢不安席日夜憂之計無所出不得不於共事者有厚望耳除臣一面嚴行催調及行撫臣多方措處必令無誤師期更乞天語叮囑該省大小文武官員俾知三省一體之義功罪惟均一切兵糧日夜催償務及師期無自取累庶可以制賊而無爲賊所制則所謂戮力同心以襄大業者也臣每念楊應龍以么麼小醜何足以辱斧鑕何足以當天討惟是處置失宜遂流禍到今大抵不重發而喪功卽輕爲而取敗故今日舉事必期一舉蕩平之爲快又念重發者尙可徐補輕爲者

急難復振故欲以萬全制之乃圖之半年而事尙有不能如意者恐久之而老師費財卒有意外之虞則後之視今猶今視昔卽死何足塞責故敢據實極言之以希聖主裁斷伏乞敕下戶兵二部亟行議覆行臣等遵奉施行庶計出萬全役不再舉則臣幸甚地方幸甚緣係播賊狂逞未已貴竹物力難支伏乞聖主處憐將給餉金並議責成分任以振軍威以圖全勝事理未敢擅便爲此具本專差承差鄧一安齋捧謹題請旨奉聖旨戶兵二部作速看了來說欽此又該戶部覆奉聖旨這兵餉急用俱依擬行各省撫按司道上緊催解以後不敷著總督遵照前旨於本省

鄰省便宜處置各官務要同心共濟依期滅賊如有抗違  
支吾的准你指名叅來重治不饒欽此又該兵部覆奉聖  
旨川貴督撫鎮道俱已近播彈壓惟湖廣兵將不齊餉又  
未備儻致失期巡撫豈逃其責但偏橋旣設總兵大師聚  
集楚地遼遠陵寢所在尙恐巡撫一人顧管難周欲差一  
官前去督理監視事甯與總兵一併裁革你該部還會同  
吏部都察院議處來看童元鎮逗遛太久著戴罪管事能  
上緊殺賊卽與題覆若再推諉怯懦不必待他失事總督  
便遵照沈尙文例一面扭解送京一面另委賢將暫署請  
旨其副將以下不用命的卽以賜劍立斬徇眾毋令參差



不整總督遵旨行毋得疑畏視爲虛文致誤事機罪有攸歸

播酋犯貴屯堡并催兵餉疏

題爲播賊分道突犯全黔勢甚阡危懇乞聖主嚴催兵餉以裒然眉事本年十二月十八日准貴州撫臣郭子章會稟十一月二十九日據新添衛報稱本月二十八日亥時蒙防守平越原任參將今充爲事官蔡兆吉稟稱播兵數萬攻陷王嶺圍劄兵聲言往新添攻打圍寨該衛官兵晝夜謹守城池隨據本衛所管喇啞夷民報稱播兵萬餘已將王嶺燒劫盡空且王嶺逼近本衛乞賜發兵應援等因同日又據帶管新鎮按察司驛傳道副使尤錫類報稱據防守平越爲事官蔡兆吉駐鎮知州李珏稟稱平越衛劉

家堡民鄒應龍報稱見賊楊總管董提調郭提調管領賊兵過雍水河稱要打我江山地方又發掃帚一把火燒木刻一箇去播州趕兵掃土快來等因同日又據監軍右參議張存意報稱據平越衛呈報本月二十七日午時據管理王解把總安榮報稱突被播賊數萬四路攻打本解榮當統苗向敵賊勢重大難敵被賊攻破頭寨殺死寨苗男婦不計其數放火大燒倉房眾苗擁榮奮死奪回屢據偵探人役報稱播苗數萬過河屯劄各處聲息攻城乞賜添兵策應等因本月三十日據清平縣知縣劉啟周稟據凱里楊燧報稱野洞七寨苗俱要反出由狗窩攻打清平城

等情又據趙崇報稱七洞等苗已攻打狎獍欲與七寨由  
草塘司入楊老攻打平越清平俱有定約伏乞憫念孤城  
添兵防禦等因十二月初二日據防守黃平參將劉效節  
及通判王三策指揮徐登階報據防守得勝關百戶薛應  
時稟稱十一月二十五日被播賊楊七楊總管統兵前來  
翁崖高漆剗營聲言我今日來報信我主楊太爺已經令  
各處搭完浮橋大兵的於二十七八准來攻你平溪浪洞  
黃平與東坡黃蓮柳塘等處我兵在此剗營只等大兵四  
路齊到夾攻卑職分兵四路哨探播兵日夜經過不絕播  
酋詭計甚多請乞加兵各處隘口把截事在然眉等因本

月初四日又據清鎮守備王之棟并偏橋衛指揮許繼祖揭報播賊於十一月二十二日猖狂擁眾剽營於偏橋城南官道水井坡離城五里大勢圍城我兵固守城外剽營對壘一日我兵傷賊馬兵奪獲縣被二牀各賊方退臺蠟原營去訖查得內有陣亡漢兵湯法等七名土兵高元等七名虜去漢兵一名羅仲重傷兵母成宗等三名其節次申報事俱經繳回又差兵由小路遞送被其截路草塘黃母徐姚爛橋一帶等哨堡軍兵四散人煙盡絕本衛漢土官兵三千有零謹守城池賊勢重大不敢輕出等因本月初六日又據湖廣辰沅兵備副使王憲霖報同前因同日

又據鎮遠衛揭報十一月十八日准本衛巡捕指揮何天寵關稱本衛軍餘郭正朝走報本日天明時分被播夷約有五六千餘將本衛許花屯中屯周旗屯窩底屯一帶地方盡劫一空虜去男婦李賢火孫等數十等情各稟報等因本月初九日又據布政司帶管分守思仁道左參政郭廷良呈十一月三十日據管思石守備事都司楊惟中報據坐鎮指揮胡效忠報稱播四十八屯軍餘黎廷恩等連夜前來報稱播賊何漢良住劄馬渡起七頭苗兵點齊於二十八日劄營三跳威逼恩等請取思石婺川龍泉地方今已知朝廷旨意先是進剿今又是剿了來說到此田地

左右是死不壞也是壞了四川水西蘭州白泥黃平已分兵敵殺你龍泉思石婆川若不先下手勦蕩將來大兵容易入境此番定然是實等情到職及查見今偏橋興隆被賊剽營接取九股生苗裏應外合等因同日又據監軍參議張存意呈報本月初六日據興隆衛呈據鄉導陳八報據臺蠟寨苗老九傳出播州把事木刻說是本衛詐哄連和我大兵已齊不日攻圍偏橋黃平你興隆既要免禍可備銀二千兩退兵待我打了偏橋黃平各兵見於梭洞立營劄兵數萬勢要攻圍城池禍在然眉萬分緊急除調官兵分布揀援其殺傷官兵及失事員役查覈另題外等因

移會到臣該臣會同巡撫貴州兼督理湖北川東等處地方提督軍務都察院右副都御史郭子章巡按貴州監察御史朱興祖看得播酋楊應龍逆節滔天自分罪在不宥又計黔中衛所郡縣數千里而遙所在單弱漢土官兵分布城守不足抗禦乃糾拽生苗分道突犯先梗塞餉道次偏攻城池爲先發制人之計初據興隆偏橋二衛報稱攻破東坡爛橋等處殺虜軍民慘毒異常今則鎮遠衛告殺虜許花屯堡矣平越新添告王僻固被據矣黃平告楊七統兵翁崖矣龍泉告何漢良剽兵三跳矣在在皆賊處處告急楚兵三萬滇粵永保之兵三萬聲息至今杳然辰沅



道兵備副使王應霖尙在沅州總兵童元鎮交代一月仍駐銅仁俱未投足到偏橋興隆參將陳寅婺川參將王鳴鶴俱泄泄未知進止何在貴之阨危甚於累卵其尤急者偏橋興隆之間東坡爛橋重安三處實爲楚黔之交會滇貴之咽喉此地一爲賊據則楚不得入黔滇不得出楚匪獨無黔且并無滇此必爭必守之地非大集勁兵勢必不守臣等會議得東坡爛橋重安三處每處當設重兵一萬共三萬庶幾道路可通咽喉不塞而後可以議及大舉先是臣化龍慮及黔省兵少力單已調廣兵一萬滇兵八千協同戰守滇兵已報入境廣兵尙未卽至今據前因又已

一面令行多方招募防守顧此三萬之兵又在原議兵數之外先所議餉纔三十萬而借之各省若有若無據臣子章所報實到黔中者尙不及數萬此亦何怪其兵力之單弱也先是臣子章借銀咨到臣化龍當日行四川布政司卽以十萬解發復行湖廣以十萬解發以濟目前蓋二省該部議徵派通融支用者故臣亦通融處之然二省之協助力止此矣若閩廣之銀不繼異日主客兵集費且不貲將何計爲之通融乎據撫臣所議乞敕下兵部急催楚兵三萬以揀偏橋思石一帶催滇粵永保兵三萬以揀興黃貴陽一帶容臣等再募兵三萬分屯東坡爛橋重安三處

以固要害而通喉舌願臣以爲募兵則撫臣之力所可爲也調兵催兵則臣化龍之力所可爲也臣已四出遣使十道徵兵計當目下可至願臣不慮無兵慮無餉耳不慮目前之餉慮兵集之後事不結餉不繼患且不可爲耳至於三省將領除總兵尙先後可到其偏裨如陳寅王鳴鶴藍方威金秉鉞諸人略無影響臣亦無處查催何以應急何以濟事統應具題伏乞皇上敕下戶部嚴催各省餉銀並乞敕下兵部嚴催各處兵將俱令及時速至但得目下兵將齊糧餉足臣獎帥三軍躬行掃蕩彈丸小寇必不令久追天誅不然彼方東衝西突我且掣衿露肘守且不固戰

於何有且不知事之所終矣臣等無任激切待命之至緣  
係播賊分道突犯全黔勢甚阡危懇乞聖主嚴催兵餉以  
揀然眉事理未敢擅便爲此具本專差承差郭榮祖齎捧  
謹題請旨奉聖旨該部知道

給由疏

奏爲給由事竊照臣見年四十七歲直隸大名府開州長垣縣人由進士萬曆二年八月內除授河南河南府嵩縣知縣八年十月內陞南京工部屯田司主事十年七月內陞本部營繕司郎中本年十月內調吏部驗封司郎中十四年六月內陞河南按察司提學僉事十六年十二月內陞布政司左參議十八年五月內陞山東按察司提學副使二十年十月內陞河南布政司右參政本年十二月內陞太僕寺少卿二十二年四月內陞通政司右通政本年五月內准吏部咨爲缺官事該本部等衙門會題奉聖旨

李化龍陞都察院右僉都御史巡撫遼東地方兼贊理軍務寫敕與他欽此備咨到臣除臣欽遵於本年六月二十九日前赴遼東地方到任管事外二十三年二月十九日爲虜眾入犯主將督兵奮勦大收奇捷事因二十二年十月內虜犯鎮武堡斬獲捷功奪獲駝馬夷器等件准吏部咨該兵部題奉欽依陞兵部右侍郎廕一子錦衣衛正千戶世襲照新銜給與應得誥命賞銀八十兩大紅紵絲四表裏照舊管事二十三年九月內爲主將出塞擣巢獲捷乞賜勘錄以昭激勸事因本年正月內十方寺堡境外斬獲功次該兵部題奉欽依陞俸二級賞銀五十兩大紅紵

絲四表裏欽此俱經欽遵訖二十五年四月內爲虜勢漸張危邊可慮伏乞議處久病撫臣以伐狂謀以安重地事該吏部題奉欽依同籍調理臣欽遵於本年五月十七日與新任巡撫都御史張思忠交代同籍訖二十五年六月內爲虜眾內附邊患稍甯乞及時大修邊政以永圖治安事因巡按御史李思孝閱視奏報本鎮修守效勞該兵部題奉欽依李化龍賞銀四十兩紵絲四表裏欽此亦欽遵訖二十七年三月二十八日准吏部咨爲欽奉聖旨事該本部等衙門會題奉聖旨李化龍著以原官起改總督川湖貴州軍務兼理糧餉巡撫四川地方寫敕與他欽此備

咨到臣除臣欽遵於本年五月二十八日到任管事訖及  
照臣於萬曆二十二年五月內陞右僉都御史巡撫遼東  
本年六月內到任管事不計外自二十三年二月十九日  
陞兵部右侍郎至二十五年五月十七日又二十七年三  
月內起補前職自本年五月二十八日到任起扣至二十  
八年正月二十八日止通前連閏實歷俸三十六箇月三  
年已滿臣係在京正三品官員例應赴部給由緣奉敕總  
督前項地方見在興師征勦播賊擅難離任如蒙乞敕吏  
部查例上請定奪緣係給由事理未敢擅便爲此具本尋  
差承差徐讓齋捧謹具奏聞伏候敕旨奉聖旨吏部知道



本部覆奉聖旨李化龍著陞都察院右都御史照舊總督

平播全書卷二終